

14 JAN 2002
Jalan-Tutup
SEBAHAGIAN JALAN TUANKU ABDUL RAHMAN DITUTUP ESOK

KUALA LUMPUR, 14 Jan (Bernama) -- Sebahagian Jalan Tuanku Abdul Rahman di sini akan ditutup kepada lalulintas selama sembilan jam bermula 5 petang esok sempena majlis Aidilfitri anjuran Persatuan Penjaja dan Peniaga Kecil Wilayah Persekutuan.

Perdana Menteri Datuk Seri Dr Mahathir Mohamad akan menjadi tetamu kehormat majlis tersebut.

Ketua Trafik Bandaraya, Supt Ishak Manan berkata bahagian jalan yang ditutup bermula dari persimpangan Jalan Chow Kit dan persimpangan Jalan Raja Alang, sejauh kira-kira 500 meter.

Beliau berkata polis menjangka kesesakan serius akan berlaku sekitar kawasan itu memandangkan laluan tersebut adalah antara laluan yang paling sibuk di bandaraya pada hari-hari bekerja.

Menurutnya, ini ditambah dengan tempoh penutupan itu yang dijalankan pada waktu puncak (5 petang) dengan kira-kira 10,000 pengunjung puladijangka akan menghadiri majlis tersebut.

"Kita akan tempatkan anggota di beberapa persimpangan berhampiran yang menuju ke laluan tersebut bagi membantu untuk menghalakan kenderaan ke laluan alternatif," katanya pada persidangan media di bilik gerakan Polis Trafik Kuala Lumpur, Jalan Bandar di sini hari ini.

Ishak berkata kira-kira 35 anggota polis trafik akan mengawal lalulintas sekitar jalan tersebut dan 96 anggota lain akan berkawal di persimpangan- persimpangan lain sekitar bandaraya seperti hari-hari biasa pada waktu puncak.

Beliau berkata tempat letak kenderaan kepada orang ramai menghadiri majlis itu tidak disediakan kecuali kepada kenderaan orang-orang kenamaan.

"Pengunjung dinasihatkan supaya meletak kenderaan mereka di tempat letak kereta awam yang sedia ada seperti Hentian Putra, Medan Tuanku, Jalan Dang Wangi dan tempat letak kereta Pusat Dagangan Dunia Putra," katanya.

Menurutnya, penguatkuasa Trafik dan Dewan Bandaraya Kuala Lumpur akan menunda mana-mana kenderaan yang menghalang lalulintas pada majlis tersebut.

Beliau meminta pengguna jalan mengelak laluan tersebut sepanjang majlis berlangsung untuk membantu mengurangkan kesesakan lalulintas bandaraya.

-- BERNAMA
AZH ZS MOZ